

Cadangan lafaz penuh ikrar Rukun Negara antara dibincangkan dalam mesyuarat MPPN

Bernama
Julai 20, 2023 21:17 MYT



KPN berkata mesyuarat juga memfokuskan kepada pelaporan mengenai pelaksanaan program yang sedang dan akan dilaksanakan oleh kementerian itu di bawah flagship Kembara Perpaduan. - Gambar FB Fadillah Yusof

PUTRAJAYA: Cadangan pelaksanaan lafaz penuh ikrar Rukun Negara dalam majlis rasmi kerajaan, di sekolah dan institut pengajian tinggi serta Kerangka Perpaduan Malaysia MADANI adalah antara yang dibincangkan dalam mesyuarat pertama Majlis Penasihat Perpaduan Negara (MPPN) hari ini.

Mesyuarat yang dipengerusikan Timbalan Perdana Menteri Datuk Seri Fadillah Yusof selaku Penggerusi MPPN itu turut membincangkan hasil kajian Indeks Perpaduan Nasional dan cadangan pemerkasaan Kawasan Rukun Tetangga (KRT).

"Mesyuarat ini juga mendapatkan maklum balas daripada ahli-ahli MPPN mengenai usaha dan inisiatif baharu yang telah dilaksanakan dalam memperkasa agenda perpaduan nasional," menurut kenyataan Kementerian Perpaduan Negara (KPN) yang dikeluarkan sempena mesyuarat itu.

KPN berkata mesyuarat juga memfokuskan kepada pelaporan mengenai pelaksanaan program yang sedang dan akan dilaksanakan oleh kementerian itu di bawah flagship Kembara Perpaduan yang merangkumi tiga kluster utama iaitu Semarak Kenegaraan, Semarak Perpaduan dan Program Komuniti Rahmah.

Semasa mesyuarat, Fadillah berkata masyarakat perlu berganding bahu bagi menjayakan gagasan Malaysia MADANI yang diperkenalkan Perdana Menteri Datuk Seri Anwar Ibrahim bagi mempercepatkan lagi proses pembinaan negara bangsa melalui teras perpaduan yang kukuh dalam mendepani pelbagai cabaran.

"Keutuhan perpaduan adalah kunci untuk keharmonian, kemakmuran serta kesejahteraan rakyat dan negara," kata Fadillah.

Menurut kenyataan itu Timbalan Perdana Menteri menasihatkan rakyat Malaysia agar menjauhi sifat ekstremis yang menabur fahaman perpecahan serta menyemarakkan api perkauman yang boleh mencetuskan perpecahan dan suasana tidak harmoni dalam negara.

Menurutnya Fadillah turut menekankan mengenai titah Yang di-Pertuan Agong Al-Sultan Abdullah Ri'ayatuddin Al-Mustafa Billah Shah ketika merasmikan Sambutan Minggu Perpaduan Peringkat Kebangsaan di Kuching, Sarawak pada 21 Mei lepas, agar nilai perpaduan dijadikan aset negara bagi menjamin masa depan, mengurangkan jurang perbezaan antara rakyat, dan rumah dijadikan asas permulaan amalan perpaduan.

KPN berkata adalah menjadi tanggungjawab bersama ahli MPPN bagi memikirkan usaha yang perlu dilaksanakan sejajar dengan kerangka perpaduan baharu yang telah dibangunkan kementerian itu berlandaskan konsep Perpaduan Dalam Kepelbagaian bagi merealisasikan konsep Malaysia MADANI.

-- BERNAMA